

«QO'QON BIOKIMYO»

aksiyadorlik jamiyati



aksiyadorlarining 2022 йил 30

июндаги йиллик умумий

йиғилишида

«ТАСДИҚЛАНГАН»

А.И.Рўзиев

Мажлис раиси

ИМЗО

«QO'QON BIOKIMYO»

AKSIYADORLIK JAMIYATI

ИННОВАЦИОН ФАОЛИЯТИНИ

Қўллаб-қувватлаш жамғармаси

Тўғрисидаги

Н И З О М

2022 йил

1. Умумий қоидалар.
2. Жамғарма маблағларини шакллантириш тартиби.
3. Жамғармани бошқариш ва Жамғарма маблағларидан фойдаланиш тўғрисида қарорлар қабул қилиш.
4. Жамғарма маблағларидан фойдаланиш тартиби.
5. Якунловчи қоида.

1-боб. Умумий қоидалар

1. Мазкур низом Ўзбекистон Республикаси Вазирлар Маҳкамасининг «Илмий-инновацион ишланма ва технологияларни ишлаб чиқаришга татбиқ этишнинг самарали механизмларини яратиш чора-тадбирлари тўғрисида» 2018 йил 12 январдаги 24-сон қарорига мувофиқ «QO'QON BIOKIMYO» АЈдаги Инновацион фаолиятни қўллаб-қувватлаш жамғармаси (кейинги ўринларда Жамғарма деб аталади) маблағларини шакллантириш, бошқариш ва улардан фойдаланиш тартибини белгилайди.

2. Жамғарма «QO'QON BIOKIMYO» aksiyadorlik jamiyatida (кейинги ўринларда жамият деб аталади) илмий амалий тадқиқотларни, инновацион ишланмаларни, тажриба-конструкторлик ишланмаларни молиялаштириш ва уларни ишлаб чиқаришга татбиқ этиш мақсадида юридик шахс мақомига эга бўлмаган ҳолда ташкил этилади.

2-боб. Жамғарма маблағларини шакллантириш тартиби

3. Жамғарма жамиятнинг инновацион фаолиятини қўллаб-қувватлаш ва ривожлантиришга йўналтириладиган маблағларини жамғариб боради.

4. Қуйидагилар Жамғарма маблағларини шакллантиришнинг асосий манбалари ҳисобланади:

жамиятнинг йил якуни натижалари бўйича соф фойдасидан 10 (ўн) фоиз миқдоридаги ажратма;

қонунчиликда тақиқланмаган бошқа манбалар.

5. Жамиятнинг “Инновацион фаолиятини қўллаб-қувватлаш жамғармаси”нинг 10 (ўн) фоизи, Ўзбекистон Инновацион ривожланиш вазирлиги ташаббуси билан ўтказиладиган инновацион ярмаркалари ва халқаро форумларини ташкил қилиш ва ўтказиш билан боғлиқ харажатларни қоплаш мақсадида йўналтириш белгиланади.

6. Жамият “Инновацион фаолиятини қўллаб-қувватлаш жамғармаси” жами маблағларининг 0,1 фоизи Ўзбекистон Инновацион ривожланиш вазирлигида ташкил қилинган Инновацион ривожланиш ва наваторлик гояларини қўллаб-қувватлаш жамғармасига йўналтирилиши белгиланади.

7. Мазкур низомнинг 4-бандида кўрсатилган Жамғарма маблағлари жамият томонидан бухгалтерия ҳисобининг алоҳида ҳисоб рақамида жамланади ва Ўзбекистон Инновацион ривожланиш вазирлигининг топшириғига ёки жамият кузатув кенгашининг қарорига асосан маблағлар йўналтирилади ва сарфланади.

3-боб. Жамғармани бошқариш ва Жамғарма маблағларидан фойдаланиш тўғрисида қарорлар қабул қилиш

8. Жамғарма маблағлари ҳисобидан молиялаштириш учун тақдим этилган илмий-амалий тадқиқотлар; инновацион ишланмалар ва тажриба-конструкторлик ишлари лойиҳалари (кейинги ўринларда лойиҳа деб аталади) жамиятнинг Илмий-техник кенгаши (кейинги ўринларда Илмий-техник кенгаш деб аталади) томонидан кўриб чиқилади.

9. Илмий-техник кенгашга кўриб чиқиш учун лойиҳалар жамиятнинг инновацияларга буюртмалар портфелини шакллантириш ва яратилган технологияларнинг тажриба-саноат синовини ўтказиш ишларини мувофиқлаштириш, маҳсулотнинг тажриба партияларини ишлаб чиқариш ва сериялаб ишлаб чиқаришни йўлга қўйишни ташкил қилишга масъул бўлими томонидан киритилади.

10. Илмий-техник кенгаш Жамғарма маблағларидан молиялаштириладиган лойиҳаларнинг илмий-техник экспертизасини ўтказди ва қуйидагилар бўйича қарор қабул қилади:

лойиҳани Жамғарма маблағлари ҳисобидан молиялаштиришга қабул қилиш ёки лойиҳани молиялаштиришни рад этиш;

лойиҳани қайта ишлашга ёки қўшимча экспертизага юбориш.

Зарур ҳолларда тегишли соҳада етарли даражадаги билим ва малакага эга бўлган олим ва мутахассислар эксперт сифатида жалб этилади.

Муҳокамада иштирок этиш учун лойиҳа раҳбари ва ижрочилари таклиф этилиши мумкин.

Илмий-техник кенгаш қарорлари кўпчилик овоз билан қабул қилинади ва унинг раиси имзоси билан баённома тарзида расмийлаштирилади.

11. Жамғарма маблағлари Илмий-техник кенгашнинг ижобий хулосаси олингандан сўнг, жамият кузатув кенгаши билан келишилган ҳолда Жамғарманинг тасдиқланган даромадлари ва харажатлари сметаси доирасида махсус ҳисоб рақамидан сарфланади.

12. Жамғарма маблағларини бошқариш жамият кузатув кенгашининг тавсиясига кўра жамият бошқарув раиси томонидан амалга оширилади. Унинг асосий вазифаларига қуйидагилар киради:

Жамғарманинг даромадлари ва харажатлари сметасини тасдиқлаш;

Жамғарманинг даромадлари ва харажатлари тўғрисидаги ҳисоботларни кўриб чиқиш ва тасдиқлаш;

Жамғарма маблағларининг мақсадли ва самарали сарфланишини назорат қилиш;

Жамғарма маблағларини шакллантириш ва улардан фойдаланиш билан боғлиқ бошқа ваколатларни амалга ошириш.

13. Жамият ишлаб чиқариш бўйича ёки инновацияларни жорий этиш вазифаси юклатилган ўринбосари:

а) Жамғарма маблағларидан самарали фойдаланишни ташкил этади ва уни ташкил этиш мақсадларига эришиш учун масъулдир;

Жамғарма маблағларидан мақсадли ва самарали фойдаланиш чораларини кўради;

Жамғарма даромадлари ва харажатларининг ижро этилиши бўйича ҳисоб ва ҳисоботларнинг юритилишини, шунингдек, уларнинг ишончлилигини таъминлайди;

б) Ўзбекистон Республикаси Инновацион ривожланиш вазирлиги билан биргаликда ҳар йили қуйидагиларни шакллантиради:

илмий-техник, инновацион лойиҳалар ва ишлаб чиқилган технологияларнинг тажриба-саноат синовларини ўтказиш ишларини, маҳсулотнинг тажриба партияларини ишлаб чиқаришни ва серияли ишлаб чиқаришни ташкил этиш учун буюртмалар портфели;

мос йўналишдаги илмий-тадқиқот ва олий таълим муассасалари билан илмий-тадқиқот ишларини бажариш бўйича тузилган шартномалар рўйхати;

моддий-техник, илмий-лаборатория базасини мустаҳкамлаш, тажриба тадқиқотларини ўтказиш, илмий ишланмаларни жорий этиш, илмий-техник кадрларни моддий рағбатлантириш ҳамда уларнинг малакасини оширишни молиявий жиҳатдан қўллаб-қувватлаш учун мос йўналишдаги илмий-тадқиқот ва олий таълим муассасаларининг рўйхати.

в) ажратилган маблағлардан фойдаланиш ва келгуси ҳисобот даврида кутилаётган харажатлар тўғрисида жамият раҳбарига ҳар чоракда маълумот киритади.

14. Илмий-техник, инновацион лойиҳалар учун буюртмалар портфелини шакллантириш ва ишлаб чиқилган технологиялар бўйича тажриба-саноат синовларини ўтказиш, маҳсулотнинг синов партияларини чиқаришни ва серияли ишлаб чиқаришни ташкил этиш, шунингдек, илмий-тадқиқот ишларини бажариш учун шартномалар рўйхатини шакллантириш меъёрлари қуйидагилар ҳисобланади:

лойиҳаларнинг жамият эҳтиёжларига мувофиқлиги;

иқтисодий ва экологик самарадорлик;

меҳнат сарфи ва ресурсларни мақбуллаштириш;

маҳсулотнинг энергия самарадорлиги ва рақобатбардошлиги;

илмий ҳажмдорлик, импорт ўрнини қоплаш ва экспортга йўналтирилганлик;

маҳаллий хом ашё асосида технологияларни ишлаб чиқиш.

4-боб. Жамғарма маблағларидан фойдаланиш тартиби

15. Жамғарма маблағлари қуйдагиларга йўналтирилади:

янги техника ва технологияларни ишлаб чиқиш, зарур тажриба-саноат синовларини ўтказиш, маҳсулотларнинг тажриба партияларини ишлаб чиқариш ва сериялаб ишлаб чиқаришни йўлга қўйишга тайёрлаш чоратadbирларини амалга ошириш билан боғлиқ тадбирларни молиялаштириш;

мос йўналишдаги илмий-тадқиқот институтлари ва олий таълим муассасалари билан илмий-тадқиқот ишларини бажариш бўйича тузилган шартномаларни молиялаштириш;

мос йўналишдаги илмий-тадқиқот ва олий таълим муассасаларининг моддий-техник ва илмий-лаборатория базасини мустаҳкамлаш, уларни экспериментал тадқиқотлар ўтказиш, илмий ишланмаларни жорий этиш, илмий-техник ходимларни моддий рағбатлантириш ва малакасини оширишда молиявий қўллаб-қувватлаш;

жамиятда инвестиция лойиҳаси асосида ишга туширилган янги техника ва технологияларни молиялаштириш учун тижорат банкларидан олинган кредитларни сўндириш.

16. Жамғарманинг жорий йилда фойдаланилмаган маблағлари қайтариб олинмайди ва мазкур Низомда белгиланган тартибда келгусида фойдаланиш учун жамиятнинг махсус ҳисоб рақамида сақланади.

5-боб. Яқунловчи қоида

17. Жамғарма маблағларини тўғри шакллантириш ва улардан мақсадли фойдаланиш учун жавобгарлик жамият раҳбари ва унинг ишлаб чиқариш бўйича ёки инновацияларни жорий этиш вазифаси юклатилган ўринбосари зиммасига юкланади.

18. Мазкур Низом Жамият акциядорларининг умумий йиғилиши томонидан тасдиқланган санадан эътиборан кучга киради.

19. Ушбу Низом, шунингдек, унга киритиладиган ўзгартириш ва қўшимчалар акциядорларнинг умумий йиғилиши томонидан тасдиқланади. Низомга ўзгартириш ва қўшимчалар киритиш тўғрисидаги таклифлар Жамият акциядорлари ва Жамият Кузатув кенгаши аъзолари томонидан киритилиши мумкин.

20. Ўзбекистон Республикаси қонунчилигининг ўзгариши натижасида, ушбу Низомнинг айрим бандлари унга зид бўлиб ёки ҳақиқий бўлмай қолса, Низомга ўзгартириш киритилгунга Ўзбекистон Республикаси амалдаги қонунчилик ҳужжатларига мувофиқ иш юритадилар.